

讚

靈山水 一滴向東流 觀音瓶內除災咎
醍醐灌頂滌塵垢 楊枝灑處潤焦枯
咽喉中甘露 自有瓊漿透
南無普供養菩薩摩訶薩 (三唱)

恭聞

四智圓明之妙體，儼若星中之皎月；四無礙辯之玄音，高超劫外之空談。運四心於四惡趣中，離四相於四生界內。信佛恩之廣布，仰聖德以彌高；惟願洪慈，鑑茲誠懇！上來奉為，今辰求懺我等，啓建慈悲道場懺法。茲當第四卷，入壇緣起。四悉檀人，於四儀中，克念攝念以投誠，心正身正而作禮。瓶簪三島之春華，爐爇六銖之香蓋；燈然慧炬，供獻純陀。禮拜旋遶，諷詠讚揚；發露披誠，克勤懺悔。切念求懺我等，自從遠劫，直至今生；迷四大之色身，受四生之輪轉；起四相之顛倒，犯四種之律儀。從迷至迷，由苦入苦；隨境風之逆順，溺愛水之沈淪。無明惟重惟深，煩惱如膠如漆；憑大法以洪宣，仗真詮而解釋。今則寸心慶快，刻骨銘肌；集大德之高流，運一心而懺悔。仰叩洪慈，冥熏加被。

四八端嚴微妙相 僧祇三大劫修來
面如滿月日如蓮 天上人間咸恭敬

第四卷入懺

啓運慈悲道場懺法一心歸命三世諸佛
南無過去毘婆尸佛 南無尸棄佛
南無毘舍浮佛 南無拘留孫佛
南無拘那含牟尼佛 南無迦葉佛
南無本師釋迦牟尼佛 南無當來彌勒尊佛

南無懺摩會上佛菩薩（三稱）

慈悲道場懺法卷第四

顯果報第七之餘

今日道場，同業大眾！重加至誠，一心諦聽！佛在王舍城，迦蘭陀竹園。爾時，目連從禪定起，遊恆水邊；見諸餓鬼，受罪不同。時諸餓鬼，各起敬心，來問目連，往昔因緣。一鬼問言：我一生來，恆抱飢渴，欲至廁中，取糞噉之；廁上有大力鬼，以杖打我，初不得近。何罪所致？目連答言：汝為人時，作佛圖主；有客比丘，來寺乞食。而汝慳惜，不與客食；待客去後，乃行舊住。緣汝無道，慳惜衆物。以是因緣，故獲斯罪。汝今華報，果在地獄。復有一鬼，問目連言：我一生來，肩上有大銅瓶，盛滿烱銅；以杓取之，還自灌頂，痛苦難忍。何罪所致？目連答言：汝為人時，作寺維那，知大眾事。有一瓶酥，藏著屏處，不依時行；待客去後，乃行舊住。酥是招提之物，一切有分。緣汝無道，慳惜衆物。以是因緣，故獲斯罪。汝今華報，果在地獄。復有一鬼，問目連言：我一生來，常吞熱鐵丸。何罪所致？目連答言：

汝為人時，作沙彌子，取清淨水，作石蜜漿；石蜜堅大，汝起盜心，打取少許。大眾未飲，汝盜一口。以是因緣，故獲斯罪。此是華報，果在地獄。今日道場，同業大眾！如目連所見，大可怖畏！我等亦可，經作此罪；無明所覆，不自憶知。脫有如是，無量罪業；於未來世，受苦報者。今日至心，等一痛切，五體投地；慚愧懺悔，願乞除滅。又復普為十方，盡虛空界，一切餓鬼，求哀懺悔；又奉為父母師長，求哀懺悔；又為同壇尊證，上中下座，求哀懺悔；又為善惡知識，廣及十方，無窮無盡，四生六道，一切衆生，求哀懺悔。若已作之罪，因今除滅；未作之罪，不敢復造。仰願十方，一切諸佛！

南無彌勒佛

南無拘留孫佛

南無迦葉佛

南無明焰佛

南無妙華佛

南無善宿佛

南無大臂佛

南無宿王佛

南無名相佛

南無炎肩佛

南無日藏佛

南無釋迦牟尼佛

南無拘那含牟尼佛

南無師子佛

南無牟尼佛

南無華氏佛

南無導師佛

南無大力佛

南無修藥佛

南無大明佛

南無照曜佛

南無月氏佛

南無衆炎佛

南無善明佛

南無無憂佛

南無師子遊戲菩薩

南無師子奮迅菩薩

南無無邊身菩薩

南無觀世音菩薩

南無佛陀 南無達摩 南無僧伽

又復歸依，如是十方，盡虛空界，一切三寶。大慈大悲，惟願救拔十方，現受餓鬼道苦，一切衆生！又願救拔十方，地獄道、畜生道、人道，一切衆生，無量衆苦。令諸衆生，即得解脫；斷三障業，無五怖畏。八解洗心，四弘被物；面奉慈顏，諮承妙教。不起本處，諸漏永盡；隨念俯應，徧諸佛土。願行早圓，速成正覺。

今日道場，同業大衆！重復至誠，一心諦聽！爾時，佛在王舍城，東南有一池水；屎尿污穢，盡入其中，臭不可近。有一大蟲，生此水中；身長數丈，無有手足，宛轉低昂，觀者數千。阿難往見，具以啓佛；佛與大衆，共詣池所。大衆念言：今日如來，當為衆會，說蟲本末。佛告大衆：維衛佛泥洹後，時有塔寺。有五百比丘，經過寺中；寺主歡喜，請留供養；盡心供饌，無有遺惜。後有五百商人，入海採寶，還過塔寺。見五百比丘，精勤行道；並各發心，欣然共議：福田難遇，當設薄供。人捨一珠，得五百摩尼珠，以寄寺主。寺主後時，生不善心；圖欲獨取，不為設供。大衆問言：賈

客施珠，應當設供。寺主答言：是珠施我。若欲奪珠，糞可與汝！若不時去，割汝手足，投之糞坑。衆念其癡，默然各去。緣是罪惡，受此蟲身。後入地獄，又受衆苦。佛在王舍城，又見一衆生，其舌長大，鐵釘釘舌，熾然火起；終日竟夜，備受楚痛。目連問佛：此何罪報，今受此苦？佛答目連：此人昔時，經作寺主；呵罵驅遣客舊比丘，不與飲食，不同供養。以是因緣，故獲斯罪。又有衆生，身體長大，頭上有鑊，熾然火燒；滿中烱銅，從四面出，灌其身上；乘虛而行，無有休息。目連問佛：此何等罪，今受此苦？佛答目連：此人昔時，作寺知事；檀越送油，不以分與諸客比丘；待客去後，乃分舊住。以是因緣，故獲斯罪。又一衆生，熾然鐵丸，從身上入，從身下出；乘虛而行，苦痛難忍。目連問佛：此何等罪，今受此苦？佛答目連：此人往昔，作沙彌子；盜衆園中，果子七枚。死入地獄，受無量苦。餘業未盡，故獲斯罪。

又見大魚，一身百頭；頭頭各異，墮他網中。世尊見已，入慈心三昧；乃喚此魚，魚即時應。世尊問言：汝母何在？答言：母在廁中作蟲。佛語諸比丘：此大魚者，迦葉佛時，作三藏比丘；以惡口故，受多頭報。其母爾時，受其利養；以是因緣，作廁中蟲。佛言：得此報者，皆由衆生，惡口麤強；宣傳彼此，鬪亂兩家。死入地獄，獄卒燒熱鐵鑊，表裏洞赤，以烙其舌；復燒鐵鈎，鈎有三刃，利如鋒鋸，以斷其舌

；復以牛犁，耕破其舌；復燒鐵杵，刺其咽中。數千萬劫，罪畢乃出，生鳥獸中。佛言：若有衆生，論說君主、父母、師長，其罪過是。

今日道場，同業大衆！聞佛此言，大可怖畏！今善惡二途，皎然可見；罪福果報，諦了無疑。惟應努力，勤行懺悔。相與披經，具見此事；若不努力，小復退懈；我今所作，何由得辦？譬如歉乏之人，心注百味，於其飢惱，終無濟益。故知欲求勝妙法、欲度脫衆生者，不可止在於心；既在心事，宜自努力，勤而行之。相與至心，等一痛切，五體投地。為地獄道、餓鬼道、畜生道、人道，一切衆生，求哀禮懺；又為父母師長，善惡知識，并及自身，一切眷屬，求哀禮懺。若已作之罪，願乞除滅；未作之罪，不敢復作。仰願世間，大慈悲父！

南無彌勒佛

南無釋迦牟尼佛

南無提沙佛

南無明曜佛

南無持鬘佛

南無功德明佛

南無示義佛

南無燈曜佛

南無興盛佛

南無藥師佛

南無善濡佛

南無白毫佛

南無堅固佛

南無福威德佛

南無不可壞佛

南無德相佛

南無羅睺佛 南無衆主佛
南無梵聲佛 南無堅際佛
南無不高佛 南無作明佛
南無大山佛 南無金剛佛
南無將衆佛 南無無畏佛
南無珍寶佛
南無師子幡菩薩 南無師子作菩薩
南無無邊身菩薩 南無觀世音菩薩

又復歸依，如是十方，盡虛空界，一切三寶。願以慈悲力、大智慧力、不思議力、無量自在力，度脫六道，一切衆生；滅除六道，一切衆苦。令諸衆生，皆得斷除，三塗罪業；畢竟不復，造五逆十惡，更墮三塗。從今日去，捨苦報生，得淨土生；捨苦報命，得智慧命；捨苦報身，得金剛身。捨惡趣苦，得涅槃樂；念惡趣苦，發菩提心。四等六度，常得現前；四辯六通，如意自在。勇猛精進，不休不息；乃至進修，滿十地行。復能度脫，一切衆生。

出地獄第八

今日道場，同業大眾！雖復萬法差品，功用不一；至於明闇相形，惟善與惡。語善，則人天勝果；述惡，則三塗劇報。二事列世，皎然非虛。而愚惑之者，多起疑異；或言人天是妄造，地獄非真說。不知推因驗果，不知驗果尋因。既因果

不分，各執世解；非但言空談有，乃亦題篇造論。心乖勝善，未曾云謬；設使示誨，執固益堅。如是等人，自投惡道；如射箭頃，墮在地獄。慈親孝子，不能相救。惟得前行，入於火鑊；身心摧碎，精神痛苦。當此之時，悔復何及？

今日道場，同業大眾！善惡相資，猶如影響；罪福異處，宿豫嚴待。幸各明信，無措疑心。何謂地獄？經言：三千大千世界，鐵圍兩山，黑闇之間，謂之地獄。鐵城縱廣，一千六百萬里；城中八萬四千鬲，下以鐵為地，上以鐵為網。火燒此城，表裏洞赤；上火徹下，下火徹上。其名則有：衆合黑闇、刀輪劍林、鐵機刺林、鐵網鐵窟、鐵丸尖石、炭坑燒林、虎狼叫喚、鑊湯爐炭、刀山劍樹、火磨火城、銅柱鐵牀、火車火輪、飲銅吐火、大熱大寒、拔舌釘身、犁耕斬斫、刀兵屠裂、灰河沸屎、寒冰淤泥、愚癡啼哭、聾盲瘖瘂、鐵鈎鐵嘴。

復有大小泥犁，阿鼻地獄。佛告阿難：云何名阿鼻地獄？阿者言無，鼻者言遮；阿者言無，鼻者言救；合言無遮無救。又阿者言無間，鼻者言無動；阿言極熱，鼻言極惱。阿言不閑，鼻言不住；不閑不住，名阿鼻地獄。又阿言大焰，鼻言猛熱；猛火入心，名阿鼻地獄。佛告阿難：阿鼻地獄，縱廣正等，三十二萬里；七重鐵城，七層鐵網。下十八鬲，周匝七重，皆有刀林；七重城內，復有劍林。下十八鬲，鬲八萬

四千重。於其四角，有四大銅狗，其身長大，萬六千里；眼如掣電，牙如劍樹，齒如刀山，舌如鐵刺。一切身毛，皆出猛火；其煙臭惡，世間臭物，無以為譬。又有十八獄卒，頭如羅刹頭，口如夜叉口，有六十四眼，眼散迸鐵丸，如十里車。鈎牙上出，高百六十里；牙頭火流，燒前鐵車；令鐵車輪，一一輪輞，化為一億火刀。鋒刃劍戟，皆從火炎中出。如是流火，燒阿鼻城；令阿鼻城，赤如融銅。獄卒頭上，有八牛頭；一一牛頭，有十八角；一一角頭，皆出火聚。火聚復化成十八火輞，火輞復變作大刀輪；如車輪許，輪輪相次，在火炎間，滿阿鼻獄。銅狗張口，吐舌在地，舌如鐵刺；舌出之時，化無量舌，滿阿鼻城。

七重城內，有七鐵幢；幢頭火湧，如沸湧泉；其鐵流迸，滿阿鼻城。阿鼻四門，於門闔上，有十八釜；沸銅湧出，從門漫流，滿阿鼻城。一一鬲間，有八萬四千鐵蟒大蛇，吐毒吐火，身滿城內。其蛇哮吼，如天震雷；雨大鐵丸，滿阿鼻城。城中苦事，八萬億千；苦中苦者，集在此城。又有五百億蟲，蟲八萬四千嘴；嘴頭火流，如雨而下，滿阿鼻城。此蟲下時，阿鼻猛火，其炎大熾；赤光火炎，照三百三十六萬里。從阿鼻地獄，上衝大海，沃焦山下；大海水滴，如車軸許，成大鐵尖，滿阿鼻城。

佛告阿難：若有衆生，殺父害母，罵辱六親，作是罪者；命

終之時，銅狗張口，化十八車，狀如金車，寶蓋在上；一切火炎，化為玉女。罪人遙見，心生歡喜：我欲往中、我欲往中！風刀解身，寒急失聲：寧得好火，在車上坐，然火自爆。作是念已，即便命終；揮霍之間，已坐金車。顧瞻玉女，皆捉鐵斧，斬截其身；身下火起，如旋火輪。譬如壯士，屈伸臂頃，直墮阿鼻大地獄中；從於上鬲，如旋火輪，至下鬲際，身徧鬲內。銅狗大吼，嚙骨啞髓；獄卒羅刹，捉大鐵叉，叉頭令起。徧體火炎，滿阿鼻城；鐵網雨刀，從毛孔入。化閻羅王，大聲告勅：癡人獄種！汝在世時，不孝父母，邪慢無道！汝今生處，名阿鼻地獄。汝不知恩，無有慚愧！受此苦惱，為樂不耶？作是語已，即滅不現。爾時獄卒，復驅罪人，從於下鬲，乃至上鬲，經歷八萬四千鬲中。捽身而過，至鐵網際；一日一夜，爾乃周徧。阿鼻地獄，一日一夜；此閻浮提，日月歲數，六十小劫。如是壽命，盡一大劫。

五逆罪人，無慚無愧，造作五逆。五逆罪故，臨命終時，十八風刀，如鐵火車，解截其身。以熱逼故，便作是言：得好色華、清涼大樹，於下遊戲，不亦樂乎？作此念時，阿鼻地獄，八萬四千，諸惡劍林，化作寶樹，華果茂盛，行列在前；大熱火炎，化為蓮華，在彼樹下。罪人見已：我所願者，今已得果。作是語時，疾於暴雨，坐蓮華上。坐已須臾，鐵嘴諸蟲，從火華起；穿骨入髓，徹心穿腦。攀樹而上，一切劍枝，削肉徹骨；無量刀林，當上而下。火車、爐炭，十八

苦事，一時來迎。此相現前，陷墜地下。從下鬲上，身如華敷，徧滿下鬲；從下鬲起，火炎猛熾，至於上鬲。至上鬲已，身滿其中；熱惱急故，張眼吐舌。此人罪故，萬億融銅，百千刀輪，從空中下，頭入足出。一切苦事，過於上說，百千萬倍。具五逆者，其人受罪，足滿五劫。

復有衆生，破佛禁戒，虛食信施；誹謗邪見，不識因果；斷學般若，毀十方佛；偷佛法物，起諸穢污，不清淨行，不知慚愧；毀辱所親，造衆惡事。此人罪報，臨命終時，風刀解身；偃臥不定，如被楚撻。其心荒越，發狂癡想；見己室宅，男女大小，一切皆是不淨之物；屎尿臭處，盈流於外。爾時罪人，即作是語：云何此處，無好城郭，及好山林，使吾遊戲；乃處如此不淨物間？作是語已，獄卒羅刹，以大鐵叉，擊阿鼻獄，及諸刀林，化作寶樹，及清涼池；火炎化作金葉蓮華；諸鐵嘴蟲，化為鳧雁；地獄痛聲，如詠歌音。罪人聞已：如此好處，吾當遊中。念已尋時，坐火蓮華。諸鐵嘴蟲，從身毛孔，啖食其軀；百千鐵輪，從頂上入；恆沙鐵叉，挑其眼睛；地獄銅狗，化作百億鐵狗，競分其身，取心而食。俄爾之間，身如鐵華，滿十八鬲。一一華，八萬四千葉；一一葉頭，身手支節，在一鬲間。地獄不大，此身不小；徧滿如此，大地獄中。此等罪人，墮此地獄，經歷八萬四千大劫；此泥犁滅，復入東方十八鬲中，如前受苦。此阿鼻獄，南亦十八鬲，西亦十八鬲，北亦十八鬲。謗方等經，具五

逆罪，破壞賢聖，斷諸善根；如此罪人，具衆罪者；身滿阿鼻獄，四支復滿十八鬲中。此阿鼻獄，但燒如此獄種衆生。劫欲盡時，東門即開；見東門外，清泉流水，華果林樹，一切俱現。是諸罪人，從下鬲見，眼火暫歇；從下鬲起，宛轉腹行，捩身上走。到上鬲中，手攀刀輪；時虛空中，雨熱鐵丸，走趣東門。既至門闔，獄卒羅刹，手捉鐵叉，逆刺其眼；銅狗嚙心，悶絕而死。死已復生，見南門開，如前不異；如是西門、北門，亦皆如此。如此時間，經歷半劫。

阿鼻獄死，復生寒冰獄中，寒冰獄死，生黑闇處；八千萬歲，目無所見。受大蟲身，宛轉腹行，諸情闇塞，無所解知；百千狐狼，牽掣食之。命終之後，生畜生中；五千萬歲，受鳥獸形。如是罪畢，還生人中；聾盲瘖瘂，疥癩癰疽，貧窮下賤；一切諸衰，以自莊嚴。受此賤形，經五百身；後復還生，餓鬼道中。餓鬼道中，遇善知識，諸大菩薩，呵責其言：汝於前身，無量世時，作無限罪；誹謗不信，墮阿鼻獄。受諸苦惱，不可具說。汝今應當，發慈悲心！時諸餓鬼，聞是語已，稱南無佛。承佛恩力，尋即命終，生四天處；生彼天已，悔過自責，發菩提心。諸佛心光，不捨是等，攝受是輩；慈哀是等，如羅睺羅；教避地獄，如愛眼目。佛告大王：欲知佛心，光明所照；常照如此，無間無救，諸苦衆生。佛心所緣，常緣此等，極惡衆生。以佛心力，自莊嚴故；過算數劫，令彼惡人，發菩提心。

今日道場，同業大眾！聞佛世尊，說上諸苦；宜加攝心，莫生放逸。相與若復不勤方便，行菩薩道；則於一一地獄，皆有罪分。今日同為，現受阿鼻地獄等苦，一切衆生；當受阿鼻地獄等苦，一切衆生；廣及十方，一切地獄，現受當受，無窮無盡，一切衆生。等一痛切，五體投地；歸依世間，大慈悲父。

南無彌勒佛	南無釋迦牟尼佛
南無過去七佛	南無十方十佛
南無三十五佛	南無五十三佛
南無百七十佛	南無莊嚴劫千佛
南無賢劫千佛	南無星宿劫千佛
南無十方菩薩摩訶薩	
南無十二菩薩	南無地藏菩薩
南無無邊身菩薩	南無觀世音菩薩

又復歸依，十方盡虛空界，無量形像：優填王金像、栴檀像、阿育王銅像、吳中石像、師子國玉像、諸國土中金像、銀像、琉璃像、珊瑚像、琥珀像、磲磔像、瑪瑙像、真珠像、摩尼寶像、紫磨上色閻浮檀金像。

又復歸命，十方如來一切髮塔、一切齒塔、一切牙塔、一切

爪塔、一切頂上骨塔、一切身中諸舍利塔、袈裟塔、匙鉢塔、澡瓶塔、錫杖塔。如是等為佛事者。

又復歸命，諸佛生處塔、得道塔、轉法輪塔、般涅槃塔、多寶佛塔、阿育王所造八萬四千塔、天上塔、人間塔、龍王宮中一切寶塔。

又復歸依十方，盡虛空界，一切諸佛。

歸依十方，盡虛空界，一切尊法。

歸依十方，盡虛空界，一切賢聖。

仰願同以慈悲力、安慰衆生力、無量自在力、無量大神通力！攝受今日道場，同為阿鼻大地獄，受苦一切衆生懺悔；乃至十方不可說，一切地獄衆生懺悔；及父母師長，一切眷屬，今日懺悔。以大悲水，洗除今日，現受阿鼻地獄等，及餘地獄等苦，一切衆生罪垢，令得清淨；洗除今日道場，同懺悔者，及其父母師長，一切眷屬罪垢，令得清淨；又洗除六道，一切衆生罪垢，令至道場，畢竟清淨。從今日去，至於道場；皆得斷除，阿鼻地獄苦；及十方盡虛空界，不可說不可說，諸地獄苦。畢竟不復，入於三塗；畢竟不復，墮於地獄；畢竟不復，為十惡業，造五逆罪，受諸苦惱。一切衆罪，願盡消滅。捨地獄生，得淨土生；捨地獄命，得智慧命；捨地獄身，得金剛身。捨地獄苦，得涅槃樂；念地獄苦，發

菩提心。四等六度，常得現前；四辯六通，如意自在。具足智慧，行菩薩道；勇猛精進，不休不息。乃至進修，滿十地行；入金剛心，成等正覺。還度十方，一切衆生。

今日道場，同業大衆！諸餘地獄，雜受苦報，不復可記。如是名號，楚毒無量；相與披覽，具見其事。經云：閻羅王一念之惡，便總獄事；自身受苦，亦不可論。閻羅大王，昔為毘沙國王；與維陀始王共戰，兵力不如，因立誓願：願我後生，為地獄王，治此罪人。十八大臣，及百萬衆，皆悉同願。毘沙王者，今閻羅王是；十八大臣，今十八獄主是；百萬之衆，今牛頭阿旁等是。而此官屬，悉隸北方毘沙門天王。長阿含經云：閻羅大王，所住之處，在閻浮提南，金剛山內；王宮縱廣，六千由旬。地獄經云：住地獄間，宮城縱廣三萬里，銅鐵所成。晝夜三時，有大銅鑊，滿中烱銅，自然在前。有大獄卒，臥王熱鐵牀上；鐵鈎擊口，烱銅灌之；從咽徹下，無不焦爛。彼諸大臣，亦復如是。

十八獄主，一曰迦延，典泥犁獄。二號屈尊，典刀山獄。三名沸壽，典沸沙獄。四名沸曲，典沸屎獄。五名迦世，典黑耳獄。六名嵯傿，典火車獄。七名湯謂，典鑊湯獄。八名鐵迦然，典鐵牀獄。九名惡生，典嵯山獄。十名呻吟，典寒冰獄。十一毘迦，典剝皮獄。十二遙頭，典畜生獄。十三提薄，典刀兵獄。十四夷大，典鐵磨獄。十五悅頭，典灰河獄。

十六穿骨，典鐵笄獄。十七名身，典蛆蟲獄。十八觀身，典烱銅獄。如是各有無量地獄，以為眷屬；獄有一主。牛頭阿旁，其性兇虐，無一慈忍。見諸衆生，受此惡報；惟憂不苦，惟恐不毒。或問獄卒：衆生受苦，甚可悲念！而汝常懷酷毒，無慈愍心？獄卒答言：如此罪惡，諸受苦者；不孝父母，謗佛謗法，謗諸賢聖；罵辱六親，輕慢師長，毀陷一切；惡口、兩舌、諂曲、嫉妒，離他骨肉，瞋恚殺害，貪欲欺詐；邪命邪求，及以邪見；懈怠放逸，造諸怨結。如是等人，來此受苦，每至免脫之日，恆加勸喻：此中劇苦，非可忍耐；汝今得出，勿復更造。而此罪人，初無改悔；今日得出，俄頃復還；展轉輪迴，不知痛苦。令我筋力，疲此衆生；從劫至劫，與其相對。以是事故，我於罪人，無片慈心；故加楚毒，望其知苦、知慚、知恥，不復更還。觀此衆生，乃可至苦，終不肯避；決不修善，往趣泥洹。既是無知之物，不知避苦求樂；所以痛劇，倍於人間。何容於此，而生慈忍？

今日道場，同業大衆！今以世間牢獄比較，便可立知，信非虛唱。若使有人，三淪獄戶，雖是親族周旋，已無惻愴；況牛頭阿旁，見此衆生，得出復入，嬰苦事長？既得免離，惟應修心，變其所習。若不改悔，永沈苦處，墮在其中，次第經歷；從苦入苦，無有休息。故三世怨對，因果相生；善惡二環，未曾暫輟。報應之徵，皎然可見；為惡得苦，還以報之。在地獄中，窮年極劫，具受劇苦。地獄罪畢，復墮畜生

；畜生罪畢，復生餓鬼。如是經歷，有無量生死、無量苦痛。豈可不人人，及時行菩薩道？相與今日，等一痛切，五體投地。普為十方地獄道，獄王、大臣、牛頭阿旁，各及眷屬；餓鬼道，餓鬼神等，各及眷屬；畜生道，畜生神等，各及眷屬；廣及十方，無窮無盡，一切衆生，求哀懺悔；改往修來，不復為惡。已作之罪，願乞除滅；未作之罪，不敢復造。惟願十方，一切諸佛！以不思議自在神力，同加救護，哀愍攝受；令諸衆生，應時解脫。歸依世間，大慈悲父。

南無彌勒佛

南無釋迦牟尼佛

南無華日佛

南無軍力佛

南無華光佛

南無仁愛佛

南無大威德佛

南無梵王佛

南無無量明佛

南無龍德佛

南無堅步佛

南無不虛見佛

南無精進德佛

南無善守佛

南無歡喜佛

南無不退佛

南無師子相佛

南無勝知佛

南無法氏佛

南無喜王佛

南無妙御佛

南無愛作佛

南無德臂佛

南無香象佛

南無觀視佛

南無雲音佛

南無善思佛

南無師子幡菩薩 南無師子作菩薩
南無地藏菩薩 南無無邊身菩薩
南無觀世音菩薩

又復歸依，如是十方，盡虛空界，一切三寶。願以自在神力，救拔地獄道，獄王、大臣，及諸地獄眷屬，十八鬲子地獄；如是十八鬲子地獄，各有眷屬等獄；盡地獄道，一切地獄，牛頭阿旁，及受苦一切衆生。令此衆生，今日俱得解脫；罪因苦果，同得消滅。從今日去，畢竟永斷，地獄道業；畢竟不復，墮於三塗。捨地獄生，得淨土生；捨地獄命，得智慧命；捨地獄身，得金剛身。捨地獄苦，得涅槃樂；念地獄苦，發菩提心。四等六度，常得現前；四辯六通，如意自在。勇猛精進，不休不息；乃至進修，滿十地行。還度無邊，一切衆生；入金剛心，成等正覺。

慈悲道場懺法卷第四

七佛滅罪真言

離婆離婆帝 求訶求訶帝 陀羅尼帝 尼訶囉帝 毗黎你帝
摩訶伽帝 真陵乾帝 娑婆訶（七遍）

補闕真言

南無喝囉怛那 哆囉夜耶 佉囉佉囉 俱住俱住 摩囉摩囉
虎囉 吽 賀賀 蘇怛拏 吽 潑抹拏 娑婆訶（三遍）

讚

因緣果報 於理昭然 鐵城縱廣徧三千
苦趣備相連 稽首金僊 出離衆熬煎
南無焰慧地菩薩摩訶薩 (三唱)

出懺

天上天下，惟佛獨尊；世出世間，此法最勝。甘露普沾於沙界，菩提香散於人間；頂舒白玉之毫光，體露黃金之妙相。凡情懇禱，應念現前；惟願洪慈，哀憐攝受！上來奉為，求懺我等，修崇慈悲道場懺法。今當第四卷，禮誦將完，功勳告畢。悲心重運，克念虔誠。香騰沈水之祥煙，燭吐優曇之華蕊；獻天廚之妙供，列禪悅之酥醪。鐘磬接天樂之齊鳴，梵音和妙音之演唱。集斯善利，普益有情。回向：覺天金像，滿月能仁；滿半滿之真詮，學無學之聖衆；天地冥陽水哲，人間烈廟樞機。鑑此葵藿之心，普降恩光之庇。出生功德，奉為求懺我等，懺除四種之愆尤，得入四空之正定。伏願：四生根本因由，如湯沃雪；四住煩惱垢障，似日融霜。迴出四流，離愛河之汨沒；速成四德，趣樂土之玄猷。四安樂行以現前，四弘誓願而堅固。多生父母，同登解脫之門；累世怨親，共證菩提之果。今則依文懺悔，誠恐宿業難除；再勞尊衆，同求懺悔。

讚

梁皇懺 四卷功德力 願滅信人四重罪
親證菩薩焰慧地 懺文舉處罪華飛
解了怨 懺了罪 消災增福慧
蓮池海會願相逢 彌陀佛前親受記
南無蓮池會菩薩摩訶薩 (三唱)

舉讚

梁皇懺 四卷已全周 回向四恩并三有
拜懺我等增福壽 惟願亡靈往西遊
焰慧地菩薩 惟願哀納受
南無登雲路菩薩摩訶薩 (三唱)